



Sesida dals

26 d'october 2021

Communitgà ils

27 d'october 2021

Protocol nr.

923/2021

Incumbensa Bondolfi

concernent la consideraziun da las trais regiuns linguisticas en gruppas da lavur, en cumissiuns spezialisadas ed en gremis da relevanza chantunala

Resposta da la Regenza

L'incumbensa Bondolfi pretenda che la diversidad linguistica da noss chantun stoppia vegnir resguardada obligatoricamain en la cumposiziun da las instituziuns e da las organisaziuns che adempleschan incumbensas publicas e ch'èn dumandadas da s'occupar da noss territori cun tut sias fassettas. Eventualmain stoppia er vegnir stgaffida la basa giuridica ch'è necessaria per quai. La Regenza è da l'avis che quest giavisch giustificgà stoppia da princip vegnir ademplì.

Tenor l'art. 1 al. 2 da la Lescha da linguas dal chantun Grischun (LLing; DG 492.100) tegnan il chantun, las regiuns, las vischnancas, las corporaziuns da vischnancas sco er autras corporaziuns da dretg public quint – cun ademplir lur incumbensas – da la cumposiziun linguistica usitada dals territoris e prendan resguard da la communitad linguistica tradiziunala. Da questa disposiziun sa lascha deducir en general, ch'il princip da la trilinguitad sco element caracteristic da noss chantun vala confirm al senn er per las gruppas prendidas en mira da l'intervenziun. En la pratica èsi dentant savens difficil da chattar in dumber sufficient e represchentativ (citad / champagna, vegliadetgna, partida politica, schlattaina, lingua e.u.v.) da commembras e commemblers per occupar las instituziuns e las organisaziuns che adempleschan incumbensas publicas. En quai che concerna l'Uniun GRdigital che vegn menziunada da las sutsegnadras e dals sutsegnaders, ha la Regenza explitgà gia durant l'ura da dumondas da la sessiun da zercladur 2021 che la suprastanza vegnia elegida da la

radunanza da las commembras e dals commembers. Ellas ed els, tranter auter er represchentanzas da las regiuns talianas, hajan pudì inoltrar propostas electoralas, quai che na saja dentant betg capità entaifer il termin previs. Adina è la finamira stada quella d'avair er represchentanzas dal Grischun talian en la suprastanza. Perquai che las candidatas ed ils candidats mancavan, n'han ins betg cuntanschì questa finamira.

Il 2 da favrer 2021 (prot. nr. 85/2021) ha la Regenza concludì da domiciliar il Post specialisà per la plurilinguitad – tenor il punct central da svilup 5.1 (Trair a niz e promover la diversitad linguistica chantunala sco schanza) dal program da la Regenza 2021–2024 – sco post da stab tar il Departament d'educaziun, cultura e protecziun da l'ambient (DECA). En il fratemp è vegnida publitgada questa piazza (delegada u delegà dal Post specialisà per la plurilinguitad) e proximamain èsi previs d'occupar tala. La persuna elegida duai sustegnair e sensibilisar en spezial ils departaments e lur posts da servetsch per realisar las prescripziuns dal dretg da linguas. Per tegnair quint dal giavisch giustifitgà da l'incumbensa, è la Regenza pronta da complettar l'Ordinaziun da linguas dal chantun Grischun (OLing; DG 492.110) cun ina disposiziun che prenda en mira che las trais regiuns linguisticas sajan represchentadas en moda adequata en ils gremis che adempleschan incumbensas publicas dal chantun.

Sa basond sin questas explicaziuns propona la Regenza al Cussegl grond da midar questa incumbensa sco suonda: L'Ordinaziun da linguas dal chantun Grischun sto vegnir complettada cun ina disposiziun che prenda en mira che las trais regiuns linguisticas sajan represchentadas en moda adequata en ils gremis che adempleschan incumbensas publicas dal chantun.



En num da la Regenza

Il president:

Dr. Mario Cavigelli

Il chancelier:

Daniel Spadin